

Upalungaarsimanermut Ingerlatseqatigiiffik Greenland Oil Spill Response A/S pillugu Inatsisartut inatsisaat nr. xx, xx xxxx 2012-imut siunnersuut.

(Naalakkersuisut Siulittaasuat)

Saqqummiussissut

(Naalakkersuisut Siulittaasuat)

Siullermeerneqarnera

Impact Benefit Agreement (IBA) pillugu Cairn Energymik 2010-mi isumaqatiginninniarnermut atatillugu upalungaarsimanermut atortorpassuit Cairn Energymit Namminersorlutik Oqartussanut tunniunneqarnissaat pillugu isumaqatigiissut atsiorneqarpoq.

Atortunik tunniussinermi siunertarineqarpoq, Namminersorlutik Oqartussat Kalaallit Nunaanni uuliakoortoqaratarsinnaaneranut upalungaarsimanissamut ingerlatseqatigiiffimmik ineriartortitsinissamut Namminersorlutik Oqartussat periarfissinneqarnissaat, taamalu Europamit imaluunniit Amerikap avannaanit upalungaarsimanermik ingerlatsisartunik pisariaqartitsisarneq annikillisarniarlugu.

Tamanna tunngavigalugu Naalakkersuisut siunnersuutigivaat, uuliakoortoqaratarsinnaaneranut upalungaarsimanissamut ingerlatseqatigiiffik, Greenland Oil Spill Response A/S (GOSR), Namminersorlutik Oqartussanit pigineqartoq pilersinneqassasoq, ingerlatseqatigiiffiup Kalaallit Nunaanni uuliakoortoqaratarsinnaaneranut upalungaarsimanissamut ingerlatseqatigiiffimmik ineriartortitsinissaq ingerlatissavaa.

GOSR'p pingaarnertut anguniagarissavaa, uuliakoortoqaratarsinnaaneranut upalungaarsimanermut, uuliakoortoqaratarsinnaaneranut pitsaaliuinermit, uuliakoortoqarsimatillugu allatullu Kalaallit Nunaanni aatsitassarsiornerup iluani assingusunik suliaqartilluni ajutoortoqarsimatillugu avatangiisinik saliisarnermut tunngassutilinnik ingerlatsinissaq. GOSR aallaqqaammut upalungaarsimanermik suliaqartartut arlallit ilaattut suliaqassaaq, taamalu inuit ikittunnguit inuttaralugit suliaqassalluni, tassa qatserisartut assigalugit sulisut qaaqquneqaratarsinnaanermut sillimasassapput.

Upalungaarsimanermut pilersaarutinut atuutereersunut imaluunniit uuliakoortoqaratarsinnaaneranut upalungaarsimanissamut pilersaarutinik nunani tamalaani pitsaassutsikkut sukanganerpaanut assingusunik pisinnaatitaaffimmik piginnittutut akisussaaffeqartunut GOSR-ip pilersinneqarnissaa sunniuteqassanngilaq.

GOSR-ip pilersinneqarneratigut Kalaallit Nunaannut tamarmut iluaqutaasussamik

uuliakoortoqaratarsinnaaneranut atortussat amerlineqassapput aamma taakkuningga atuinissamut piginnaaneqarneq qaffanneqassaaq.

Piffissaq ungasinnerusoq isigalugu anguniagaavoq, nunani tamalaani malittarisassat naapertorlugit uuliakoortoqaratarsinnaaneranut upalungaarsimalluarnissaq eqqarsaatigalugu ingerlatseqatigiiffiup ineriartortinneqarnissaa.

Siunertaavoq, piffissaq ungasinnerusoq isigalugu ingerlatseqatigiiffiup namminersortunngorsarneqarnissaa. Kalaallit Nunaanni uuliasiornerup inuussutissarsiutitut nutaatut ineriartortinneqarnera ilutigalugu namminersortunngorsaaneq ingerlanneqassaaq.

GOSR-ip ingerlanneqarnissaanut aningaasalersuineq pissaaq aalajangersimasumik pisartagaqarnermik aaqqissuussinerup aamma pisinnaatitaaffimmik piginnittut aalajangersimasumik suliaqarnerisigut isertitat ataqatigiissinnerisigut, tassa ingerlatseqatigiiffiup aningaasaleeqataassutai teknikkikkut imaluunniit niuernikkut iluanaarniuteqarsinnaaneratigut unammillersinnaassappata.

Tamatuma qulakkiissavaa, ingerlatseqatigiiffiup aalajaatsumik isertitaqartarnissaa, aamma piffissani suliaqarfuaallaanngitsuni, taamaattumik ingerlatsinermut atatillugu Namminersorlutik Oqartussat aningaasartuuteqassanngillat.

Namminersorlutik Oqartussat GOSR-imik piginnittuunissaat piviusunik arlalinnik tunngaveqarpoq. Taamaattoq Namminersorlutik Oqartussat inuussutissarsiutitigut sulianut peqataanissaat pillugu politikikkut kissaateqarnermik tunngaveqanngilaq.

Uuliakoortoqaratarsinnaaneranut upalungaarsimanissaq eqqarsaatigalugu atortut uuliasiorfissuarnit GOSR-imut tunniunneqarnissaat pillugu siunissami IBA-mik isumaqatigiissutigineqartartussanik isumaqatiginninniarnermut atatillugu ingerlatseqatigiiffiup aallartisarneqarnerani Namminersorlutik Oqartussat piginnittuunissaat pisariaqartinneqarpoq. Taamatut aaqqissuussinermut tunngavilersuutit arlaqarput, ilaatigut uku tunngavigalugit:

- Namminersorlutik Oqartussat pigisaqarput nalilinnik, Nunatta Karsianut aningaasartuutaanngitsumik nunatsinni uuliakoortoqaratarsinnaaneranut upalungaarsimanissamut ingerlatseqatigiiffimmik pilersitsinissamut niuernikkut iluanaarutigineqarsinnaasunik.
- Ingerlatseqatigiiffiup nutaanik amerlanerusunillu atortorissaarutissaanik pissarsinissamut IBA-mik ingerlatsilluni suliaqarnissamut atatillugu isumaqatiginninniarnissap attuumassuteqartinnissaanut Namminersorlutik Oqartussat piginnittuunissaat pisariaqarpoq. GOSR akeqanngitsumik atortorissaarutininik pissarsinissamut assingusumik periarfissaqanngilaq, tassa Namminersorlutik Oqartussanit pigineqannginnami.

Aammattaaq aningaasatigut kiffaangissuseqarluni ingerlatsinikkut kiisalu namminersorlutik suliffeqartut piginnaasaqarfiinik atuinikkut immikkut ilisimasaqarnissap, sunniuteqarluarnissap isertitaqartitsilluartarnissallu qitiutinneqarnissaannik qulakkeerinnissinnaasunngortitsisumik suliassat niuernerpalaartumik tunngaveqartinneqarnissaat pissutigalugu ingerlatseqatigiiffiup ilusissaa aaqqissuunneqarpoq.

Taamaattumik Naalakkersuisut inassutigaat, siunnersuutip taama isikkoqartillugu akuerineqarnissaa.

Taamatut oqaaseqarluni siunnersuut Inatsisartunut suliassanngortinneqarpoq.